

Corinto anuabu Paulõ ha katxu hatu kene bumanikiaki

2 CORÍNTIOS

Paulõ hatukiri xinānikiaki, na hātẓarā

1 ¹Ē Paulo Jesus Cristõ kuxipayawakī Deusū hawē xinānē ea katunikē nukubetā ikūwaī nukū betsa Timóteobetā ē Paulõ ē ana matu kene bumaii. Deusunabu Corinto mae ewapa anushū mā ikūwaību inū dasibi nukubetā Jesus txibaību Acaia mai pakea anu manibaunabu ē matu kene bumai uīrashākāwē, haska mā unānumamēkainā. ²Nukū Epa Deus inū nukū Shanē Ibu Jesus Cristõ hau matu unānuma hiwemakī pewakī duawakubainūbūwē.

**Ikūwaību betsabu bika tenei huīti nixmabu
hatuwē nuitikiaki, na hātẓarā**

³Nukū Shanē Ibu Jesus Cristõ Epa Deus, habias nukū Epari nukuwē nuikī nukū huīti punu nukai tsiū ikai nuku daewakī benimawakubaīmisrā, kēhairawakubainākāwē. ⁴Hamapai tibi mei nū bika teneaya Deusū nuku daewakī nuku benimawamiski. Nuku haska wamiswē taeshū Jesus Cristo ikūwaī betsabu hawara mei bika tenei huīti nixmaibu Deusū ma nuku merabewamiskē hatuwēri nuikī nū hatu benimawariatirubuki. ⁵Haskakē haska Cristo bikahaira hiwekī tenekubaini keska nū hawenaburi hawē taea dayariai bikabiakē nū hiweaburā, tsuabura habūri ikūwaī dayashūkī teneriaibu Cristo hau hatuwēri nuinū habu huīti nixmabu binumakī hatu benimawakī xinā txākāwākubainākāwē. ⁶Ea inū Timóteo hamapaiwē nuku bika tenemaibū nukuwē taea nukukiri xinātxakai mā huīti nixmama mā Jesus Cristo ikūwanūbū nū tenekubainaii. Ha inū, Deus nukuwē nuikī nukū huīti tsiū ika nixmabiakē nuku benimawamishū haska maturi memaibu merabewati xara nū tenemiski. Haskakē hawa dateama habiaskari

maturi akaibu mā teneriairā, hawē kuxipakubaikāwē, maemairā. ⁷Haska inū, nū imis keskai bika hiwēkī mā teneaubū haska merabewai nukuwē nuikī nukū huīti nixma Cristō nuku benimawamis keska wakī habiari matuwē nuikī matū huīti nixma benimawashanai matukiri dateama nū manakubainai.

⁸Ē betsabu inū ē puibuū, eska Ásia mae pakea namakis anushū nū hatu yusiāiwē taeshū haska bikahaira nuku hiwemaibu nū tenekubaīyama matuki ana txaninū nīkakāwē. Hawara bika nukūmebi haska nū tenetiruma inū nū binutiruma hamapai txakabu tibi tenei nukū hiwea ma benua keska ⁹xinaī: “Natiā daki nuku ma tenākanikiki”, ikī hawara nukūmebi nū atiruma ibubis nū xinābiaya Deusū nuku yusikī haska hatū mawabu bestēwāshanaitū nukū hamapai tibi nuku ashūtiru nū ikūwātirubu Deusū nuku haska binumakubaīyamaki. ¹⁰Ha inū, nū mawapanā haska Deusū nuku mekeyama keska wakī nuku ashūkubaīshanai hawa dateama ikūwākī nū manakubainai. ¹¹Nū haskamiskē nukukiri xinākī merabewakī Deusbe hātxakī nuku yukashūkubaikāwē. Itxapabū mā nukukiri Deus yukakubainaibū Deusū nuku mekekī duawaya itxapabūri nukukiri nīkakī Deus kēhairawatiruburiki.

**Hawawē haskatima hawē yuba betsa Paulō
hatu banabimanikiaki, na hātxarā**

¹²Hamē nukukirirā, haska yurabū Deus unābumā xinaī kēmīs keskama hakia Deusū nuku xinā betsa wamatā huīti pepa nuku waniwē taeshū haska Deusū abumis nuku xināmaya tsua parāma duapa bestikūkaini matuwē nuihairai nū kēkūkainai, matuwē taea txanima benimairā.

¹³Matu kene bumakinā, hātxa huneawē matu keneshunama hātxa shabakabi mā uīkī pe nīkatirubu besti nū matu keneshūkubaīmiski. Ana mā nīkakī pehairawakē eāri matu nīkai ē benimashanai. ¹⁴Nukukiri mā nīka beshmas waii. Hakia nukū Shanē Ibu Jesus ana huaya mā pepaibu matuwē keī nū benimaya nū matu yusī pewamīswē taea inū nukuwēri taea benimakī mā nuku kēwāriashanai ē manakubainai.

¹⁵Haskawē taea matuki txiti ikī haska ē xinaī. Haska matu anu kashū matu uīkatsis ikī ha dukū ē xinaīma keska dabeki matuki bai kai ¹⁶Macedōnia mai pakea anu hiweabu dukū uīatābaini hanua matuki bakī matu benimawatā hanua txītūkirani hui matuki ana bakī ana ē matu benimawaya hanua Judéia mai pakea anu hiweabu anu ē kaya matūri mā ea merabewatiru xinaī: “Ē matuki bai kashanai”, matu watā ē haska matu keneshunimaki. ¹⁷Matu anu bai kanū ika txanima ē yubakaimaki. Haskawē taea ē xinā dabewaisma mā ekiri xinātirumaki. ¹⁸Ē xinā betsa betsapa ē maewama Deusū unaikiki. Haskawē taeshū mā nuku ana ha atirubumaki. ¹⁹Ea inū Timóteo inū Silvanonā, Deusū bake Jesus

Cristokiri besti nū matu yusīmiski. Hawē bake Jesus Cristokiri yubakai hātixani Deusū betsa waisma haska menenishū betsa wama akubaīmiski. ²⁰Ha inū, Deus yubakani hawē bakewē dasibi shabakabi kaka kaīmaniki. Haskakē yurabū Deus kēwāyā habū hātixa abukī Cristō kuxipawē yuikī: “Hātixa txanimaki. Habiaskaki”, ikī nū kēwāmisbuki. ²¹⁻²²Haska inū, nuku dasibibū Cristo nū txibaīburā, hawē kuxipawē Deusū Yushī Pepawē unāti xarawatā hawenabu benutimawakī nuku ibuwaniki. Haska wanishū nuku heneama duawapakeshanai mestēwai Deus yubakaniki. ²³Haskakē matu dake tenemakatsi ikama haskai mā Corinto anuabu ē kariama hau nukū Epa Deusū matu shabakabi unāmanūwē, ē txanitxakama ea unaīkikirā. ²⁴Ha inū, nukū Jesuskiri nū matu ikūwāmamisrā, nukurā, nū ibumaki. Jesus ikūwai ibubis matū xinā ewai mestētā kuxipai mā benimakubainūbū matu merabe bestiwai nū matu dayashūkūkaīmiski.

2 ¹⁻⁴Haska matukiri xinākī matū huīti punu nukawakī tsiū akatsi ikama haska ē matuwē nuhairai mā ea unānūbū, iwanā, matu xinākī kashabetanā matu merabewanū, iwanā, ē matu kene bumaimaki. Matu anu hikituxitā tsuabura ē matu huīti punu nukawakī tsiū akaya tsuā eari benimawatirumaki, ē matu punu nukawatuxikenā. Hanua mā ma pewaxikē ea benimawaya maturi ewē mā benimashanaii. Haskakē natiā matu anu ē kakatsi iyuamaki.

**Hunī ikūwābiai txakabuwayama ana has
xināma hakimawatikiaki, na hātixarā**

⁵Ha hunī kanekī ea punu nukawakī ea besti akama matu dasibiburi akima ikū mā unaiī. ⁶⁻⁸Na besti ē matu yuiāi nīkakāwē. Hawē txakabuwē taeshū mā ha tashnimaima matube ana itxatiruma tenehairakubaikī hatishū mā bika tenemaima henetā ikūwai hau heneyamanū matu mā hawē nuiai hau unānū ana itā beyawakī daewarikāwē. Hakiri hawē txakabu ana xināma hakimawakī maturi hakimarikāwē. ⁹Haska inū, ē matuki txiti itā haska ē matu yusīkubaīmis ha txibākī mā amis unānū, iwanā, matu keneshūri bumakī hakiri ē matu haska yunuimaki. ¹⁰⁻¹¹Haska Satanāsā nuku parākatsis ikai nū unāhairaya hau nuku txakabū maemayamanū hawara ha hunī akubaīyama hakimakī hari hakimawatā mā ana xinābumakē matū xinā pe unākī eari hakimai ē ana xināmariki. Merabewakī ē matu kuxipa wakatsi ikaii. Cristō ē xinā ea bebūshū unāyā hawara txakabu mā hakimaimakē eāri ha hunī txakabuwayama ē ana haska hakiri xinātirumariki.

**Deusū Cristoki nuku dasiwatā hamapai bika
nuku binumamiskiaki, na hātixarā**

¹²Ha inū, Deusū kakape Cristokiri datā akī yusīkatsis iki Trôade mae ewapa anu ē hikiaya yura itxapabu Deusū ea nīkamaya tsuabūra ea

nemamabiakē ¹³Cristowē taea ē betsa Titoki ē nukuriama inū matukiria hawa bana nīkariama ē huīti punu nuka kayashū hatu yuikī: “Ē ma kaii”, itā Macedônia mai pakea anu Tito benai ē kaīkainimaki.

¹⁴Hakia Cristoki nū dasia nū hawenabukē hamapai bika Deusū nuku habetā binumakubaīmiski. Ha inū, nukuwē hawē kakape yurabu Cristokiri mae tibi anua yusīmakī nuku hatu unāmamiski. Nukuburā, nū nis hawērua keskabuki. Haskawē taeshū Epa Deus kēwanākāwē. ¹⁵Ha inū, hawē Epa benimawakī Cristō hawē hiwea sheni ininipa keska inākubaini haska keska yusīkī Epa Deus benimawakī yurabu anu nū bumiski, Cristokiri yurabu dasibi, betsabū Cristo ikūwaību inū betsabū nīkabiakī ikūwābuma benushanaibu anurā. ¹⁶Haska xinaībutunarā, nukū yusīanā, ikūwābumā nuku nīkamarā, atimapa yura mawa pisi mayai keska shetekī aka wakanikiki, nuku danākinā. Hakia dasibibū nukū yusīa nīkakī Cristo ikūwākī nukū yusīa ininipa keska abukī benukatsi ikama haska niti ikama Deusbe hiwekuīshanaibu bikubaīkanikiki. Hakia Cristokiri shabakabi yusīa mesekenā, tsuabūra nū xinā txakai, ha hiweakirirā? ¹⁷Haska xinābuma yusīnā betsabū Deusū hātxaki meseama kemukī pei besti binū, iwanā, bukubaūkī yusīmis keskama nukuburā, Deusū nuku yunukī hawē kuxipa nuku inākē matu parāma hātxa txanima nū matu yusīayā hawē hātxawē taea nū Cristoki dasiabū txanima Deusū nuku pe uīayā Jesus Cristokiri nū yusīkubaīmiski.

**Corinto anua ikūwaību uīkī Paulō hatu
yusīmiskiri unātirubukiaki, na hātxarā**

3 ¹Na haska ē ana matu yuiairā, ana nukūmebi nū kēkatsi ikamabia txanima besti ē matu yuiiai nīkakāwē. Tsuāra hatu yusītanū ika hukī habū keneya bemisbuki. Hamē nuku ikirā, huni betsā keneya nū mapuisbumaki. Hanua matū mae anuari nū kaya hau merabewakī nuku i pewashanūbū matū keneya nū kaismariki. ²Nū ma matu yusīmiswē taea matū xinā betsa watā matū hiwea betsa watā mā ma pepa besti hiwea hatu uīmairā, haska nū matu yusīmis unaki kenea keskama nukū huītiki kene nea keska dasibibū ha kene uīa keska wakī matu uīkī unākanikiki. ³Deusū hawē yunuti inū hawē nemati Moisés inākī mixkiki Deusū kenekī netāni keska wakī natiā shabakabi matu uīnūbū nukū yusīawē Cristō hawē Yushī Pepawē txīta tushkutimawē matū huītiki kenea keska wakubainikiki. Hakia Deus hiweatū Yushinī matū xinā betsa wamakī matū yuraki hawē kene netā keska waikiki.

⁴⁻⁵Ha inū, nukūmebi nū ikai keskai nū kētiruma inū nukūmebi nū hawa atirumabia hawara dasibi nuku amakī Deusū hawē kuxipawē nuku amamiski. Na haska ē matu yusīmisrā, Cristowē taea Deus nū ikūwāpakeaii, nū ana txītuāmarā. ⁶Jesus Cristo mawaiwē Deusū hawē nuku yuba bena wai maewakinā, ana hakiri kenewē akama iniki. Hakia

ha binumakī hawē Yushī Pepawē aniki. Haskawē taeshū tsuabura Deusū hawē taeshū nuku tapīma nū hawē dayarubu besti nuku wamiski. Hamē Moisés Deusū yusīkī hawē yunuti inū hawē nemati inākinā, tsuāra ha yuba meneamakē hawē hatu kupikatsi amaniki. Hakia Deusū Yushī Pepatunā, nuku haska wama ha binumakī hawē yuba benawē nuku hiwea inākubainikiki, nū habe hiwepakeshanūbunā.

⁷Deusū hawē yunuti inū hawē nemati mixkiki keneshū Moisés inā hatu unāmakī yuikubainū ika mati anua Moisés butukē hawē besu txashakirākiranai maībiaya hawē datekī Israelbū Moisés beistirubuma inikiaki. Haska hatu wabiani dasibi Deusū yunuti inū hawē nemati Moisés ināni tsuabūra txibātirubuma ha dayani kanemisbu Deusū hawēri hatu kupishanikiki, niti akama Deusuma mawa kayabi tenemakinā.

⁸Hakia haska nukū txakabu Cristō buakatsis inikiri Deusū Yushī Pepatū nuku yubakī hawara Deusū Moisés yusia yusī hawē besu txasha txasha iki kuxipai txani pehairabianikē hawē Yushī Pepatū haska wani ana binumaikiki. ⁹Eskati wakī aniki, ana matu yuinū nīkakāwē. Hawara Deusū Moisés yusīni pebiakē tsuāra: “Dasibi Moisés hātxa ē txibātirumakī”, ishū txakabuwaibu hawē taeshū unātā hatu kupiti kaka waniki. Haska hawara Moisés yuini kuxipabiakē Deusū hawē bakewē taeshū binumakī Deusū nuku ma pepawaikiki. ¹⁰Haska inū, haska Deusū Moisés yusīni pebia hawauma keska hawē yuba benawē binuhairaikiki. ¹¹Ha inū, hawara mixkiki Deusū Moisés keneshū ināni hawē yuba pebia beshtekei beshmasaya hanua Cristowēri nuku ana yuba bena wani nū ma tapiā pehairakūkaishanikiki, niti ikama ikibi ikirā.

¹²⁻¹³Eska Israelbū Moisés besu uikī hawara txashahaira maī beshmasai hau uīyamanūbū Moisés tari tuashwē hawē besu hunei bepukukūkaini keskama haska nukūri nū ikūwaību Cristo manakakī nukū hātxa hakiri huneama hawa dateama shabakabi nū yusīkubainai. ¹⁴⁻¹⁶Haska Moisés hātxa danākubiranaibu hatū huīti Deusū kuxiwani keska wakī natiā habias yubani hātxa betsabū danāriaibu hatū huīti Deusū kuxiwariamiski. Moisés hātxa kenei yuiaibu hatu nīkamamakī bepukī hunemiski. Tsuabūra Cristo danākī Moisés hātxa nīkatirubumakī. Tsuabūra na habiatiā Deus kēwānū, iwanā, benakī Deus unākatsis ikaibu hātxa shabakabiwē Deusū hatu nīkamamiski. Haskakē Cristo ikūwanū ikaibu Deusū hatū huīti ana kuxiwama inū Moisés hātxa ana bepuama shabakabi tapīkī nīkatirubuki. ¹⁷Hanua nukū Shanē Ibu inū hawē Yushī Pepatū habiaskas xinaībū hawē Yushī Pepatū nuku mekeaya txakabū nuku ana tsumama inū pepanū, iwanā, hawē yunuti inū hawē nemati Deusū Moisés yusīniwē nuku ana bikawatirumakī. ¹⁸Haskakē dasibi nū Jesus Cristo ikūwaīburā, ha yusīniwē nukū besu inū nukū xinā nuku ana bepuamakī. Nukū Shanē Ibū nukū xinā nuku betsa wakubainaya hawē kuxipawē ha itsa nuku wakubainikiki. Unāshubira nukū hiwea betsa

wakĩ nuku pewakubainikiki. Nuku haska wakĩ nukũ Shanẽ Ibũ hawẽ Yushĩ Pepawẽ nuku hatu uĩmakubainikiki.

Jesus Cristokiri yusíkubauni eskanibukiaki, na hãtxarã

4 ¹Haskakẽ Deus nukuwẽ dabanã ikĩ hawẽ yuba benakiri nũ yusĩnũ ishũ nuku yununiwẽ taea hawẽ babui punu nukai nũ beshstekeisbumaki. ²Hakia hawa dakeama hawara huneshũ nũ aisma inũ, matxupakĩ tsua nũ paraĩsma inũ, Deusũ hãtxa hamakiri yuikĩ nũ betsa waismaki. Nũ haska wamiswẽ taea hiwekĩ nũ yusĩmis Deusũ unãyã hawẽ hãtxa nũ matu shabakabi yusíkubaĩmiski, hau dasibibũ nukũ yusĩa nĩkatã hatũ xinã pewanũbunã. ³Cristokiri nũ hatu yusĩa ha hãtxa tsuãra nĩkamarã, hãtxa bepukuaki. Habu hatũ txakabuwẽ benushanaibũ nĩkatirubumaki. ⁴Tsuabũra habũ ikũwãbumarã, na mai anushũ hatũ shanẽ ibu Satanãsã hatu parãkĩ hatũ xinã nemakĩ bekũ keska hatu wamiski. Haskawẽ taeshũ Cristo, Deus itsa hiwea mekenika kuxipa yurabu mawashũtã hatũ txakabu ana xinãma buakatsis ini nĩkabiakĩ kaka pepa shabakabi ikũwãtirubumaki. ⁵⁻⁶Haska inũ, mai damiwakĩ Deusũ yuikĩ: “Mexu anua hau shabayunũwẽ”, anishũ habiatũri nukũ huĩti anu shaba peshani keska wakĩ Deusũ Cristo nuku unãmaya hawẽ kaka pepa Cristokiri nũ shabakabi matu unãmakubainaii. Haskakẽ yusĩkĩ: “Jesus Cristo nukũ Shanẽ Ibu kayabiki”, ikĩ, “Jesus Cristo abuhairakĩ nũ matũ dayaru bestiki”, ikĩ shabakabi dasibibuki txani ibubis nũ keĩsmaki.

Bika tenebiakĩ Paulõ Deus ikũwãkubainikiaki, na hãtxarã

⁷Ha inũ, Deusũ yusĩkĩ hawẽ pepakiri nuku tapĩmaya dasibi kuxipa Deusuna inũ nukũmebi nũ hawauma hau mã anãnũbũ nukũ yura babuhaira, mai xumu pusimis keskbianu hawẽ kakape nukũ huĩti merã nuku netãtã hawẽ tsumabu Deusũ nuku waniki. ⁸⁻¹⁰Haska inũ, Jesus anibu keska wakĩ nukuri itxakawakĩ tenãkatsis ibiaibũ hamapai bika betsa betsapa nuku waibu tenekĩ Jesus Cristo nukũ Shanẽ Ibu hiweatũ nuku merabewakubainai txĩtuãma dasibibu nũ hatu uĩmakubainaii. Haska tibi Jesus Cristõ nuku merabewamis matu yuinũ nĩkakãwẽ. Hamapai bika betsa betsapa nuku tenemakĩ harakiri nuku pashatimawabiaibũ nukũ Shanẽ Ibuã bai nũ manaka besumawamaki. Ha inũ, nuku tenãkatsis ibiaibũ hatuwẽ datekĩ nukũ Shanẽ Ibu nũ henebaĩsmaki. Nuku nemanũ ishũ kushakĩ nuku di abiaibunã, hawẽ taeshũ nuku yamawatirubumaki. ¹¹Natiã nukuri hiweyushũ Jesus nũ txibaĩwẽ taeshũ nuku tenãkatsis ibiaibũ Jesus ini keska hiweriakĩ nukũ yurawẽ nũ haskashunai dasibibu nũ hatu uĩmakubainaii. ¹²Haskakẽ shaba betsa nũ matu mawabiashũshanaya Jesus Cristokiri nũ matu yusĩmiswẽ taea niti ikama maturi benuama mã habe hiwepakeshãkanaii.

¹³Haskakiri Davĩ kenekĩ: “Deus ikũwaĩ hakiri ã hãtxakũkainaii”, ini keskai nukubũri Deus ikũwãriai hawara nũ ikũwaĩ nũ hakiri yui

hãtxariakūkainaii. ¹⁴Ha inũ, Jesus mawa Deusũ bestẽwanishũ nukuri bestẽwãkĩ maturi bestẽwãriatã Deusũ ibubis nuku habis beismakĩ nuku iyushanai unãkĩ hawẽ hãtxa nukũri nũ yusĩkubainaii, hawa dateamarã. ¹⁵Haska inũ, Deusũ matu pepawaya mirimabũ Jesus Cristo ikũwãtã benimakĩ mã Deus kẽhairawanũbũ hawara matuwẽ taea bika tenekĩ matu merabewanũ ika nũ ikũkainaii.

¹⁶⁻¹⁸Hawara bika shabakabi mekĩ nũ teneai hawaira keyushanaiwẽ nuiama haska Deusũ mekekĩ niti akama nuku habe hiwemashanai uĩriamabia xinãkĩ nũ uĩkatsis ikaii, ikibi ika hunea keskarã. Ha inũ, natiã na hiweawẽ nũ hiweairã, bikaixta nũ teneai hawama keskaki, hawaira hayabiatã keyumisrã. Hakia haska hawẽ taea nũ bika teneairã, Deusũ pewẽ kupikĩ nuku benimawatxakayamashanai akũhaira bikatsi nũ manaii. Haskakẽ nukũ yura ewanai babui mawabiaya bari tibi Deusũ nukũ hiwea tibi uke meranua nuku benawakubainaya punu nukai nũ txitũtirubumaki.

5 ¹Haska inũ, na mai anu nukũ yurawẽ nũ hiwea peã shubuwẽ nũ hiweyua keskabukiaki, hatiara hawaira nũ debushanairã. Hakia nai anu nukũ hiwe nũ hanu hiwei kashanairã, Deusũ ma nuku akibi ashuniki, yurabũ hiwe wamis keskamarã. ²Haskakẽ na mai anu nukũ hiwea txakabuwẽ nũ nuitapayuaii. Hanua txipu nai anu nukũ hiwe pepa anu hiwei kakatsi iki nũ manayukubainaii. ³Na nukũ yura mawa txapukẽ hawaira nũ hawa saweama keska ishanai nũ unaiĩ. Hakia yura bena txipu Cristõ nuku inãyã nũ tari bena sawekĩ akawashanaii. ⁴Natiã nũ hiwearã, hawawẽ haskatima nũ bika teneyuaii. Mawatã nũ txapukatsi ikamabia nũ ma mawa kasmai nũ hiweyuarã, Jesusũ nai anu nuku ainitã hiwea bena inãkĩ nukũ yura bena nuku inãshanai nũ manaii. ⁵Deusũ nuku haki maewakatsi bebũkiri yubakatã hawẽ Yushĩ Pepa hawẽ unãti watã kanetima nuku inãni hawẽ taeshũ nũ bishanairã, nũ hayaki.

⁶Haskawẽ taea nũ benimakũkainaii. Na nukũ yurawẽ nũ hiwea nukũ Shanẽ Ibube benãta nũ hiweyua nũ unaiĩ. ⁷Ha shabakabi nũ uĩyamabia uke merã xinãkĩ nũ ikũwaiĩ. ⁸Na nukũ yura nũ henebaĩshanaii, nukũ Shanẽ Ibube hiwei kakinã. Hawa dateama punu nukama nũ hiweyukũkainaii. ⁹⁻¹⁰Ha inũ, dasibi nukuburã, nũ hamakiri kama nukũ Shanẽ Iuhaira Cristo hanu tsaushũ unãti wamis anu haki nukutã nuku tibibũ habis nũ beissãkanaii. Nuku tibi unãkĩ Cristõ nuku manakuakeakeshanikiki, na yurawẽ hiweshũ nũ pepa amis inũ nũ txakabu amis unãtã nuku tibi kupikinã. Haskakẽ na mai anu nũ habe hiweriama kasmai nũ habe hiwei kashanairã, nukũ yurawẽ nukũ Shanẽ Ibu nũ benimawakatsi ikaii.

Cristõ Deus nuku daewashũkĩ nuku haibuwamanikiaki, na hãtxarã

¹¹Haskakẽ nukũ Shanẽ Ibũ kuxipa mesekei datekĩ hawẽ kaka pepakiri yurabũ hau Jesus ikũwanũbũ nũ hatu yusĩbaunai haskai nũ hiwemis

Deusū nuku unāhairaikiki. Haskawē taeshū hau mā tapīrianūbū pe hiwekī hātxa txanima nū matu yusīmis unākī mā xinātiruki. ¹²Haska yurabū xināmis keska xinaī nukūmebi nū keāmaki. Hakia nukukiri hātchakī nukukiri pe xinākī mā nuku kēwātirubuki. Betsabū yura bemakis uīkī unāti wamisbuki, hatū huīti hatu shabakabi uīyamabiarā. Haska nū yusīmis besti ē matu yuiāi ea nīkakāwē. ¹³Nū patapa unaīsmāpa keskabukiaki. Hakia abukī nū Deus duawaibu yura betsabū nuku uīkī haska nū dayamis nīkama yuikī: “Paulo inū habetā yusīmisbu patapa unaīsmāpabuki”, ikaiburā, haskakī Deus nū duawamis yura betsabū unābumaki. Hatuwē nuiyamakāwē. Ha inū, yura betsabū nuku uīmisshū nukukiri yuikī: “Shabakabi hatu yusīkanikiki”, mā imisburā, matu merabewanū, iwanā, nū akubainai. ¹⁴Cristo nuikipatū nū hawē kuxipayabu nuku ma mestēwanishū nuku txishukubainikiki. Dasibibuwē taea huni bestitxai nuku mawashuni ikūwānishū nū unai. Habiaskariai habū ikūwāshanaibu itxapaburi habe mawanibu keskaki. ¹⁵Cristo mawairā, dasibi hatu ishuniki. Hamē ikama habu hiweabu ishuinā, hau ana hatūmebi hatū xinānē besti hiweyamanūbū hau ha hiweshūshanūbū hatu ishuniki, mawatā ana hatu bestēshunirā. ¹⁶Haska inū, nukunā, haska ikūwābumā xinaī hātchamisbu keska nū ana hatū xinā keskamaki. Ha dukū Cristokiri xinākī: “Yura kayabi bestiki”, iwanā, nū xinābiaya Deusū nuku ma betsa wakē betsahaira Cristokiri nū ma xinaī. ¹⁷Hanushū tsuabūra Cristo ikūwai haki nukui dasiayarā, habū xinā sheni Deusū betsa waya hawara mekī txakabuwamis henetā hatū Shanē Ibu Cristo txibānū ika yura bena keskabuki.

¹⁸Na haska Deusū daya tibirā, Cristo hamebi hawē Epa daewakī hawē haibuaibu nuku wamaniki. Haskawē taea nū daenāmei haibunamenūbū nuku katunishū hawē kakape nuku yusīmakubaūmiski. ¹⁹Na habias Deusū xināni ē matu ana yuiāi ea nīkakāwē. Cristowē yurabū txakabu ana xinātimawani Cristobe Deus dayakī yura dasibibu hatu haibuwakatsis ikī habū Cristo unātā ikūwai hau unānuma hiwekubaīshanūbū na txanima hātcha nū hatu yusīkubainū nuku yununiki. ²⁰Haskakē Cristō kuxipa nū hayawē taea nū hawē hātcha bushunikabuki. Nukuwē Deus hātchaxi keskaya Cristo ea ashūkī nū matu yukashūmiski. Eskaki. Matu yuinū nīkakāwē. Nukuwē taeshū Deusū hātcha ikūwai Cristo matu mawashuniwē Deus daewai habe haibunamekāwē. ²¹Jesus Cristo hawa txakabu meamahairabiakē hakia nukū txakabuwē taeshū txakabu memis keska wakī Deusū Cristo aniki. Nū Cristowē taea pepa keskabu Deusū nuku ana kupikatsi ikama: “Ē haibuaibu txakabu hayama keskaki”, iwanā, Deusū nukukiri haska xināmiski. Haskakē Cristo matu mawashuniwē taea Deusbe haibunamekubaīkāwē.

6 ¹⁻²Ha dikabi yura tibi Deusū yuikī:
 “Ē tsuara nīkakatsis ikaya

mĩ ea kenaya mĩ hãtxa nĩkatã
 ha shaba ikaitiã ã mia mekekĩ merabewashanaii”,
 ikaya nĩkatã Isafasi keneniki. Haska shabakabi ã matu xinãmai nĩkakãwẽ.
 Natianã, Deusũ matu nĩkakatsis ikikiki. Ha inũ, natiã matu mekekatsis
 iriaikiki. Haskakẽ mã Deusbe dayakĩ ashũmis matu yununũ nĩkakãwẽ.
 Hamẽmẽs Deusbe haibunamei beparameama ikũ kayabi Deusũ hawẽ
 pepa ma matu uĩmaki. Danãyamakãwẽ. Haskawẽ taea nukurã, nũ Deusũ
 daya ashũkĩ merabewai dayashunikabuki.

**Hamapai bika Paulo tenemabiabu txĩtuãma
 shabakabi hatuki txaninikiaki, na hãtxarã**

³Deus nũ dayashunaiwẽ taeshũ hau tsuabũra: “Mã kaneaii”,
 iki hau nukukiri hãtxayamanũbũ pe hiwekũkaĩkĩ nũ tsua kanekĩ
 uĩmatxakaismaki. ⁴Hakia nũ haskai Deusũ tsuma ikinã, eskawẽ nũ matu
 uĩmamiski. Hamapai bika nuku tenemaibu mei hawa hayama nuitapakĩ
 nũ hawa hatu kemama tenekubaĩmiski. ⁵Eska tibi nuku wabu meirã,
 nuku unãbumã nuku kuxa kuxa akinã, nuku bitxikinã, nukuki shukubirã
 hãtxa txakabuirã, daya kuxipa meirã, usha tenekĩ buni tenetã nũ Deus
 dayashũkũkaĩmiski. ⁶Haska inũ, nukũ hiwea pepa kayabi nũ hatu
 uĩmairã, tsua parãma inũ, unãnepai sinatama txanima nũ ikũ kayabi
 ikai Deusũ Yushĩ Papatũ kuxipaya nũ Deusũ tsumabu txanima nui kayabi
 nũ hiwekũkaĩmiski. ⁷Ha inũ, Deusũ kuxipa nuku merã nũ hayawẽ taea
 kaka txanima nũ yuimiski. Habias Deusũ kuxipa pepawẽ unãmakĩ nũ
 hatu atximamiski. Ha inũ, habiawẽri hakiri txakabu yuibiaibũ nũ hatu
 nemamiski. ⁸È hanu haska wakĩ hatu merabewa bestiaitiã yura betsabũ
 nuku kẽwaĩbũ hatiritũ yuãkĩ nuku kẽwaĩsbumaki. Ha inũ, yura betsabũ
 nukukiri shetxakaibũ betsabũ nukukiri pe yui hãtxamisbuki. Ha inũ, yura
 betsabũ nukũ yusã danaĩ: “Matxupaki”, nuku wabiaibũ txanima yui besti
 nũ hãtxakũkaĩmiski. ⁹Yura itxapabũ nuku uĩsma akawabiaibũ betsabũ
 nuku unãhairamisbuki. Danãkĩ nuku debu wapaiabiabu habiaskabia nũ
 hiweyukũkainaii. Nuku itxakawabiakĩ hawa nuku tenãriabumaki. ¹⁰Ha
 inũ, habũ nuku xinã nũ punu nuka dabanẽ xinãkanikiki, Cristo txibaĩ
 nũ xinãtxãkaĩ nũ benimabiakũkainaya nũ hamẽ nia nuitapai keska
 xinãmisbuki, nũ hatu tapĩmai itxapa enayabiakenã. Nukuburã, nũ hawa
 hayama keskabia dasibi Deusũ nuku haya wamiski.

¹¹Corinto anushũ ebetã ikũwaĩbuũ, hãtxa matu bumai hawa
 huneama hãtxa shabakabi besti nukũ xinãnẽ hawa teshewama nũ matu
 yuiaiwẽ taeshũ ¹²haska mã nukukiri xinãmis xinaĩrakãwẽ. Nũ matuwẽ
 nuikĩ nũ matu danãmabiakẽ matũri matũ nui uĩmakĩ mã nuku hawa
 waismaki. ¹³È matu yuiai ea nĩkakãwẽ. Mã ã bake keskabu ã matu waii:
 “Merabewai haska ã matuwẽ nuimis keskai duapai ewẽri nuikãwẽ”,
 iwanã, ã matu keneshunaii.

Ikūwābumabe ketashametimakiaki, na hātstarā

¹⁴Haska matubū mā ikūwaīnā, ha habū ikūwābumabe Deusū matu ana hatube ketashamekatsi ikama xinānishū xināmiskiri matu yuinū nīkairakāwē. Hawara Deusuna peparā, ha danaī pepabe husitirumē? Shaba pebiakē mexū haibuai shabatirumē? ¹⁵Habiaskariai Cristo Satanāsbe haibunā pepatirumaki. Ikūwaību betsari ikūwābumari hatube haibunā pepatirumaki. ¹⁶Hanushū Deus kēwāti Temploorā, hanushū yushī dami betsa ha merāshū kēwātirubumaki. Nukū yurarā, hanushū Deus hiwea kēwāti Templo keskaki. Haska Deusū hamebi ibubiskiri yuini nīkakāwē:

“Habu anu hiwei hatube nīkūkaini
ea ē hatū mekenika Deus ikaya,
haburā, enabu ishākanikiki”

¹⁷ikaya kene betsawē ana habias hātshawē Deus Yavē yuiki:

“Habū ea danaību anua kaībaīkī henebaīkī
ana txakabu mei atimapayamakāwē.

Mā haskakūkainaya matuwē benimakī ē matu beyawashanai,

¹⁸matu haska watā ē bakebu matu wai
matū epa ē ikūkaīshanai”.

Deus kuxipa dasibi binuatū yuiyai hawē hātsha yuishunikabū nīkatā
keneniki.

Habiaskari ē matu yuiyai.

7 ¹Ē betsabu inū ē puibuū, haskakē Deus nukuki hawē pepa yubakani hawē hātsha nū hayaki. Haskawē taeshū nukū yura inū nukū yushī mekei Deuski mesekī ana hawara txakabū nuku atimapa watiru ana akama henetā pepai hawenas ikubainākāwē. Haskai nū hawama dasibi Deusunabu itirubuki.

Paulō yunua txibākī ashuaību benimahairanikiaki, na hātstarā

²⁻⁴Mā pe hiweabuwē taea matukiri nīkatā xinaī hawa dateama matukiri shabakabi hātshakī ē matu kēwaiī. Hamapai bika nū tenerabebiai haska mā pe hiweabu nīkai ē huīti benimahairai. Matū txakabu henetā nuku keskakī Deus duawanū ika mā hiweaya matuwē nuhairai ē matuki ana ha ikamaki. Haskarā, ma bebūkiri ē xināwē ē matukiri txanimaki, ē matube hiwekatsi ikai inū ē matube mawakatsis ikairā. Hanua nū tsua txakabuwaismabiakē yura eskarabes matu anushū nukukiri xinā txakakī: “Paulo inū habetā yusīmisbū nukū hamapai biākī nuku nuitapawakī itxakawakī nuku paraīmabuki”, ikaibu nū hatu haska waismawē taeshū hatu ikūwāyamakāwē. Hakia nū matū haibuabuwē taea matuwē nuhairakī nū matu pe xināmis keska wakī nukukiriri pe xinākāwē.

⁵Macedōnia mai pakea anua nū huai yura itxapabū nuku yumāwākī nuku haska wakubiranimabu matu yuinū nīkakāwē. Deus danākī nuku

itxakawakĩ bikawakĩ nuku deteaibũ harakiri haskatima date paepai nũ hani haskatã huĩrukũtirumahaira ikimaki. ⁶Hakia haska yura babu punu nukabu Deusũ benimawamistũ nukũ haibu Tito nukuki nukumakĩ Deusũ nuku benimawaimaki. ⁷Ha Tito hikituxikĩ nuku benimawai bestiwẽma hakia haska matube pe hiwetã matube haskaxina txaniai nĩkai inũ haska ha huni hawẽ ibuã aĩbe hiwea nitxĩmashũ ikis mã ha huni merabewai inũ, haska mã ea uĩkatsis ikai Tito nukuki txaniaya ẽ xinã txãkaĩ matuwẽ ẽ tse ikũkainimaki.

⁸Hanushũ ẽ kenewẽ ẽ matu dakewakĩ huĩti nixmawakĩ ẽ matu tsiũ akima ẽ unaiĩ. Ha inũ, matu haska bumai eari ẽ huĩti tsiũ iriayuiimaki. Ẽ matu haska waima ẽ ana haskakiri matu xinãmakĩ. ⁹Hanushũ ẽ matu haska waya matũ txakabu unãtã xinã betsa watã hawara Deusũ matu amakatsis ikai dateama mã akimaki. Ha inũ, matu ha abiakĩ nũ hawa matu txakabuwama ikima mã unaiĩ. Hakia nukũ hãtxa nĩkabiata matũ xinã mã betsa wamakenã, Deusũ matu kupikeanimaki. Haskawẽ taea natiã matuwẽ ẽ benimaii. ¹⁰Tsuabũra ikũwãkĩ nũ txakabu wai unãtã henenũ ikĩ xinã betsa wai nukũ huĩti nixmaya hau nukũ txakabu nuku buashunũ Deus benakĩ nũ ea akaya benimakĩ nukũ txakabu ana xinãma nuku hakimawakĩ Deusũ nuku buashũmiski. Hakia habũ Cristo ikũwãbumanã, hatũ txakabu unai punu nukabia hatũ xinã betsa wama Deusũ hatu merabewama mawa kayabi hayapakeshanikiki. ¹¹Hakia maturã, matũ txakabu haska Deusũ matu unãmaiwẽ matũ huĩti nixmabiata pepanũ, iwanã, ẽ yusĩa txibaĩ ẽ haska abuai ea uĩmai eki mesekĩ ha hunĩ txakabukĩ matu txakabuwaima haska waima ẽ matu xinãma matu datei haki sinatatã pewai hawa kuxi dakewakĩ mã nemaimaki. Haska ẽ matu waima ha huni pewai mã hawa hawẽ txakabu ana habe hayama nũ unaiĩ. ¹²Eskawẽ taeshũ ẽ matu ha aniki. Ha huni hawẽ ibuã aĩbe hiwea merabewanũ, ikama inũ hunĩ hawẽ aĩ ma mebiã merabewanũ ikamari hakia haskama nukuwẽ nuikĩ haska nukũ yusĩa mã txibãkatsis ikai Deusũ matũ xinã unãmaya mã unãnũbũ: “Mã itxamis anua ha huni nitxĩrikãwẽ”, iwanã, matu anu kene bumakĩ ẽ matu haskakiri xinãkĩ bumayamaki.

¹³Hawaira ẽ yunuti txibãkĩ mã akimakẽ ana huĩti nixmama matuwẽ hanũkaĩ nũ xinã txãkaĩ. Haska bestiwẽma Tito matube hãtxakĩ matũ xinã pe unãtã matuwẽ xinã txãkãkirani nukuki ana nukutã matukiri nukuki txaniaya haska tibi matukiri nĩkatã nũ benimahairakũkainaii. ¹⁴Haska hãtxa txanima nũ matu yuimis keska wakĩ Tito matu anu ẽ nitxĩriama matukiri kẽwãkĩ ẽ kaneama ikimawẽ taea ẽ hawa matuki txakabumaki. Haskawẽ taea txanima hawara matukiri ẽ yuima mã habiaskaki. Haska ẽ Tito yuima keska uĩmakĩ mã beyawaimawẽ taea nũ matu kẽhairawaii. ¹⁵Ha inũ, haska eki inũ ẽ keneki mesekĩ Tito beyawakĩ mã iakeakekĩ ẽ kene ẽ matu anu bumayama nĩkatã ẽ yunuti mã txibãmis

xinaĩ matu uĩtãyamashũ Titõ ana matu abuhairakubainikiki. ¹⁶Mã tãĩtuĩsmawẽ taea ẽ matuwẽ benimahairariakũkainaii.

**Hawara mã haya yauxiama nuitapaibu
pashkashũkubaĩtikiaki, na hãtxarã**

8 ¹È betsabu inũ ẽ puibuũ, Macedõnia mai pakea anua itxamisbu Deusũ hawẽ nuiwẽ hau Jerusalém anuabu nuitapaibu hatu merabewanũbũ, iwanã, Deusũ hatu duawamaimakiri ana ẽ matuki txaniaii. ²Hatu bika tenemabiaibũ yumãbiakĩ haska xinãma hatũ huĩti nixmama nuitapabiai benimakubaĩkĩ hawa yauxiama hatũ pei itxawakĩ: “Eskarabes nũ hayabũ hawara nũ haya hatu inãkĩ Jesus ikũwaĩbu Jerusalém anua merabewanãkãwẽ”, iwanã, itxapa itxawaimabuki, pei itxapa hayabu keskakinã. ³Haska wakĩ hatũ xinãnẽ inãkuĩkĩ hawa yauxiama hati inãtirumabia binumaibu eã ẽ hatu uĩma ẽ matuki txaniaii. ⁴Nũ haska hatu yunuamabia nuku ea akĩ: “Nukũri nukũ betsabu nũ hatu merabewakatsis ikaii”, ikĩ nuku yuikubainimabuki. ⁵“Hati bikãwẽ”, ishũ nũ hatu manakamamabia haska Deusũ abumis keska wakĩ hatũ yurawẽ nukũ Shanẽ Ibu dukũ duawanũ ikĩ nukuri ha katxu merabewaimabuki, hatũ inãkuĩwenã. ⁶Haskakẽ pei itxawakĩ Macedõnia mai pakea anu itxamisbu anushũ Titõ hatu taewamaima keska wakĩ matu anu kashũri hau matũ merabewati pepa mã itxawaxina hau matu itxawamakĩ pewai kashanũ Tito nũ haska yunuxinaki. ⁷Matunã, ikũwãkĩ betsabu mã hatu binumiski, Cristõ kakape ikũwãkĩ inũ, Deusũ hãtxa shabakabi unãkĩ inũ, shabakabi unãnepakĩ inũ, hamapai Deus mã ashũturu akĩ inũ, haska merabewati nuku anua nui mã tapĩmiswẽ taea ikũwaĩbu betsa mã hatukiri xinaĩnã matũ nuikipa uĩmakĩ Jerusalém anuabu nuitapaibu hatu merabehairawakãwẽ, betsabũ akima binumakinã.

⁸Haska matu yuikĩ ẽ matu yunuti mese washunamaki. Hacia Macedõnia anuabũ hatu ashuĩmabu keska wakĩ Jerusalém anua nuitapaibu ikũwaĩbuwẽ maturi mã nuiyai shabakabi dasibibu mã uĩmatirubuki, iwanã, ẽ matu haska xinãmaii. ⁹Ha inũ, nukũ Shanẽ Ibu Jesus Cristo nai anua hawẽ Epa Deusbe hiwea habe shanẽ ibuhairabia dasibi hawenabia henebirã hawẽ pepawẽ matu pepawanũ ika matuwẽ taea nuitapai matuwẽ nui mawaniki, hawẽ taea mã nuitapama dasibi haska yubakani mã ibu washanunã. Haska matu washuniwẽ taeshũ mã hatu merabewatiruki. ¹⁰Haska inũ, na haska merabenãtikirirã, eã haska ẽ matukiri xinaĩ matu yuinũ ea nĩkakãwẽ. Hatu merabewakatsis ikĩ bari betsatiã matũ pei itxawakĩ taewakĩ benimayabi mã ayamaki. ¹¹Natiã ana matũ pei itxawakĩ haska mã hatu merabewakatsis iyama keska wakĩ benimai mã yubakai taeyama keska habias xinãwẽri ana benimakĩ matũ pei haki dasiwakĩ itxawakĩ keyutã hatu inãshãkãwẽ. ¹²Hanushũ tsuabũra txanima kayabi yura betsa merabewakatsis ikaibu Deusũ hatũ

xinã nuima unãkĩ hatuwẽ Deus benimamiski. Hawara haya inũ hawara hayama xinãma hafia haska hawara pepa nũ haya nũ inãtirubu Deusũ nukukiri xinãmiski.

¹³Haska merabenãtikiri ẽ matuki txaniairã, betsabu mã merabewamatiru hirabi matũ mesti mã atirumaki. Txipu mã nuitapatiruki. Haskakẽ hawara mã hayama iriaya habias keskari wakĩ matu manakutirubuki, iwanã, ẽ matu yuiai. ¹⁴Natianã, Jerusalém anuabu ikũwaĩbu nuitapai piti eskarabes hayabuki. Hafia maturã, itxapa mã hayaki. Haskawẽ taeshũ txipu haburi itxapa hayabũ maturi eskarabes mã hayakẽ matu merabewatiruburiki. Haskai mã binunãntirubumaki, senẽbukuinã. ¹⁵Haska Moisés kenei nĩkakãwẽ: “Nai anua duru Deusũ niri akai habũ itxapa tupikĩ itxawaibũ hanushũ betsabũri eskarabes tupikĩ itxawariatã habũ ha piti pi hawa bika teneama ipaunibukiaki”. Haska keska xinãkãwẽ.

**Titobe buaibukiri Corinto anuabu Paulõ hatu
banabimanikiaki, na hãtxarã**

¹⁶Hanushũ matu merabewakatsi iki nũ matuwẽ nuiai keskai Titori habias xinã haya matuwẽ nuiriai kakatsis iki kaya benimakĩ Deus pepa wakĩ ẽ kẽwaiĩ. Hau matu anu kanũ nũ nitxiã hawaira matu anu kaikiki. ¹⁷Habiaska xinãyã daki ẽ yunua hawaira ea nĩkatã hamebi matu merabewakatsis iki matu anu kaikiki.

¹⁸Tito matu anu kaya nukũ betsã Deusũ kakape datã akĩ pe yusĩ heneisma hakiri dasibibũ pe uĩkĩ yuimisbu Titobe nũ ha nitxĩriaii. ¹⁹Haska inũ, hau Jerusalém anu nukube kakĩ nukubetã ha inãkuĩ pei bushanũbũ, iwanã, Macedõnia anushũ ikũwaĩbu itxashũ ha huni katuimabuki. Ha inũ, nukunã, ikũwaĩbu betsabu nuitapaibu nũ merabewakatsis ikai habũ nuku uĩkĩ nukũ Shanẽ Ibu nũ duawai merabenaĩ nũ haska abuai nũ hatu uĩmakatsis ikaii, haska daya beyairã. ²⁰⁻²¹Yurabũ nukukiri yuikĩ: “Ikũwaĩbũ pei itxapa Jerusalém anuabu itxawashunimabu haska Paulõ inũ habe buaibũ bukĩ haska waimabumẽ?” iki hau nukukiri xinã txakai ha iyamashanũbũ dasibi shabakabi pewakĩ haska Deus inũ yurabũ nuku amakatsis ikai hatu uĩmakĩ nũ pewanũbũ hawara yauxiama mã hatu inãkuĩshanai benuama aru pewatã nũ hatu bushũshanaii.

²²Ha inũ, betsarã, habube ẽ nitxĩainã, nukũ betsã ikũwaĩ pepa ma kayatapĩni txĩtuĩsma hamapai betsã betsapa pewanika ha dikabi mã haki txiti itiru ẽ ha matu nitxĩshũriaii. ²³Hamẽ Tito ebe dayakĩ ebetã matu merabewamis mã unaiĩ. Hamẽ ha nukũ betsabu Macedõnia anua ikũwaĩbũ katuimaburã, habe ẽ hatu nitxĩainã, Cristõ kuxipa hayaburi bukanikiki. ²⁴Haskakẽ habu ha ikũwaĩbũ matu uĩyã haska mã hatuwẽ txanima nuiai hatu uĩmakĩ beyawashãkãwẽ. Mã hatu haska waya haska wakĩ nũ matukiri kẽwãkubaĩmis mã hatu uĩma kayabishanaii.

9 ¹⁻²Mã Corinto mae ewapa Acaia mai pakea anuabũ ua bari betsiã naitapaibu Jerusalém anuabu matũ inãkuĩa mã habũ inãkatsis ikai nĩkatã dasibi Macedônia mai pakea anu manishũ ikũwaĩbu mã akai kakai nĩkatã mirimabũ habunari bumakatsi iriaibuwẽ taeshũ matukiri kẽwãkĩ naitapaibu mã merabewati xinãnikẽ ẽ ana haskakiri txanikĩ matu keneshunamaki. ³⁻⁴Hakia ẽ matukiri kẽwãbiamis dasibi matũ pei mã itxawashũ aruriamakẽ Macedônia anuabu ebe bukĩ mã haska ariama dama tapĩ itsakĩ hatu uĩmai hanis akĩ hau matu dakewakĩ eari dakewakĩ txakabuwayamashanũbũ, iwanã, matu merabewakĩ nukunabu dabe inũ besti matu anu bebũkiri ẽ hatu nitxiaĩ. ⁵Haskakẽ haska matũ pei mã bebũkiri inãkuĩkatsi mã yubayama keska wakĩ mã habũ inãriamatũ nuiama hatu inãkĩ keyukãwẽ, matũ yauxi hatu uĩmamarã. Hawara mã inãtĩru hawaira mã inãnũbũ matu anu nukunabu dabe inũ besti habũ matu merabewai bunũbũ dasibi bebũkiri hatũ berubi mã pewakĩ keyunũbũ ẽ hatu nitxiaĩ.

**Hawa yauxiama hatũ inãkuĩ hau inãshanũbũ
hãtxa pewẽ hatu yuinikiaki, na hãtxarã**

⁶Hanua haska hunĩ eskarabes mibaĩmatũ yunu ewai kaniai eskarabes tsekamis inũ, hunĩ mirĩma mibaĩma hawẽ yunu ewai kaniai akũhaira tsekamisrã, haska keska xinãkãwẽ. ⁷Haskakẽ yauxiama hatu merabewakĩ nukũ hawara benimayabi nũ hatu inãyã Deusũ abumiswẽ taeshũ tsuã matu yunuamabia bestibu haska mã yubaima keska hatu merabewai yauxibetanã inũ sinatabetanã inaĩ xinãma hawara mã pashkakatsi ikai hatu inãkuĩshãkãwẽ. ⁸Ha inũ, merabewakĩ hamapai betsa betsapa yura betsabu ashũkĩ matũ hawara pashkashũ mã hatu merabewaya Deusũ matu duawakĩ akũhaira pawamakĩ matuna binumakĩ inãkĩ matu ashũtiruwẽ mã duanametirubuki. ⁹Deusũ haska xinãmiskiri Davĩ keneni matu yuinũ nĩkakãwẽ.

“Txikixama dayabiamis dasibi hayamakẽ
Deusũ hawẽ pepa keyuismawẽ
hatu duawakubaĩmiski”,

aniki. ¹⁰Haska keska Deusũ nuikipabu hatũ hawara inãmistũ maturi matuna inãmiskẽ yauxiama pashkashũ mã hatu inaĩbu ana akũhaira matu inãkĩ binumakĩ Deusũ matu merabewamakubaĩshanikiki. ¹¹Haska inũ, Deusũ itxapa matu inãmiskẽ pashkashũ matũri yura betsabu mã inaĩbu nũ matu haska yusĩmiswẽ taeshũ yura itxapabũ Deus kẽwãshãkanikiki. ¹²⁻¹³Hawara Deusũ matu amakatsi ikai txibãkĩ Cristo ma ikũwaĩwẽ hawẽ kakapewẽ matu betsa wa yura betsabu shabakabi merabewakĩ mã hatu uĩmashanai. Ha inũ, na mã hatu merabewashanai nukũ betsabu Jerusalém anua hawa hayabumakẽ nũ hatu bushuã bitã benimakĩ Deus kẽhairawashãkanikiki, matũ pepawẽ taeshunã.

¹⁴Ha inũ, haska bestiwama haska duahairawakĩ matuwẽ Deusĩ hatu merabewai habũ unãkĩ matu abukĩ Deus matu yukashũkubaishãkanikiki. ¹⁵Haska washũ nukũ hãtxawẽ nũ Deus pepawakĩ keyutirumaki. Haska Deusĩ binumakĩ nuku dasibi duahairawakĩ hawẽ inãkuĩwẽ Deusĩ hawẽ bake nuku mawamashuniwẽ hawenabu nuku waiwẽ taeshũ Deus kẽhairawakubainãkawẽ.

Paulo yuãmisbu shabakabi hatu unãmanikiaki, na hãtxarã

10 ¹⁻²Haska bestibu mã ekiri hãtxamis ẽ Paulõ ẽ matu yui ai ea nĩkairakãwẽ. Matu anushũ betsabũ yuikĩ: “Paulo nukube hiwea hãtxahairaisma yunuama unãshubira nuku hãtxa wabiamis txaikeshũ nuku keneshũkĩ hãtxa kuxipawẽ yunukĩ nuku ha amiski”, iwanã, mã ea yuãbiamisbũ haska duapakĩ ẽ xinãmis matu yuinũ nĩkairakãwẽ. Haska mã yuibiaya hãtxa kuxipawẽ ẽ matu kũyã atirubia haska duapakĩ unãshubira Cristõ yurabu yusĩkubaini keska wakĩ hãtxa shãkamawẽ yuikĩ matu kũyã akatsi ikama matu anu ẽ ana kakẽ habũ ea shenĩkamisbu ẽ hatube hãtxakatsi ikamaki. Hatũ xinã betsa wamakĩ hau ana hamakiri xinãtxakayamanũbũ hatu meshtãmakãwẽ. ³Hanushũ tsuabũra nukũ Shanẽ Ibu txibãkatsi ikabumã yura betsabu parãkĩ hawara ibubis akatsi ikai akĩ yura betsabu binunũ, iwanã, hatube sinataibube detenamei hatũ mabu kuxipa tibiwẽ haki txiti itã detenamei hawẽ kuxipai hiwemisbuki. Hakia habu keskama ⁴nuku ikirã, hawara Deusĩ nuku amakatsis ikai akĩ Deus inũ Cristo danaĩbu ha txakabuki txiti ika hawẽ kuxipaibu binumai Deusĩ kuxipawẽ hatu ha akĩ nũ hatu nuitapawatiruki, detenamei keskakinã. ⁵Haska inũ, haska Deus danaĩ unãnepabũ xinãmis hawauma wakĩ Deus nũ hatu unãmakatsis ikai, hatũ txakabu beshteketã xinã betsatã hau Cristo txibanũbunã. ⁶Cristokiri nũ matu yusĩbia mã nuku txibãmakenã, nũ matu kupikatsi ikamaki. Menã hawaira nuku nĩkatã txibãkĩ pewarikãwẽ. Mã ma pewakẽ tsuabura huĩti kuxibu nũ kupishanai.

⁷Hatiritũ xinã txakakĩ yuikĩ: “Cristoki dasia nũ hawenabuwẽ taea ẽ unãhairaii”, mã ikaibunã, nukurã, nũ habias Cristoki dasia nũ hawenaburiki, uĩkĩ hau xinãnũbuwẽ, shabakabi nũ ikũwainã. ⁸È matuki hawẽtxaĩs haska Cristõ hawẽ kuxipa ea yununikiri hawa dakeama ẽ txanimis hawẽ taeshũ matu beshtekĩ txitũmakatsi ikama hakia hawẽ merabewakĩ nukũ Shanẽ Ibũ kuxipawẽ ikũwãmakĩ ẽ matu kuxipa wakatsis ikũkainai. ⁹Na kene ẽ matu bumaiwenã, hawẽ taeshũ matu datẽnũ, iwanã, ẽ matu bumamaki. ¹⁰Hamẽ bestibũ ẽ kene uĩtxakakĩ yuikĩ: “Hãtxa bika inũ kuxipa keneshũ nuku yunubiai Paulo nuku anu hiwea unãnepa keskama huni babu hawẽ hãtxa hameaĩ tsuã kẽwãtirumaki”, mã imiski. ¹¹Haska hari bestibu yui mã hãtxamisrã, nũ txaikeshũ matukiri kenewẽ nũ matu yunumis keska wakĩ kashũ matu

bebūshūri habiaska mā imis hātxa kuxipawē nū matu shabakabi yui kashanaii.

Yusīnā betsa kēmisbu Paulō hatu txitenikiaki, na hātstarā

¹²Haska nū yusīmis yusīnā betsabū hatū yusiawē matu nuku danāmakī putamakatsi ikanikiki, haska hatūmebi yusiṭxakai kanei ēhē iki atimapakinā. Ha binunānai keaību keska nū haska hayamaki. ¹³Hanira kashū hawē daya nū ashunū hatishū besti Deusū tanashū nuku yununi anu besti dayai nū kētiruki. Hakia hanu nuku yunuama anu ibubis dayama haskawē taea ha binumai nukubu nū keāmaki. Deusunā, haska tibi hanu kesua anu nū kanū nuku henea nū kamiski. Haskawē taea matu Corinto anuabu mā ikūwāriabuma anu nuku yununiki. ¹⁴Haskawē taea nuku dukū matu anu Deusū nuku yunua kashū nukū dukū Deusū kakape Cristokiri datā akī nū matu yusī taewaniki. Hamē hari Deusū nuku yunuama inirā, nukurā, haskarara nū matube ikeanaii. ¹⁵Nukuburā, huni betsabu ma dayani anu hikitā nū kēkatsi ikamaki, nukū dayamawē taearā. Hakia nuku ikirā, matube dayakī nū taewaniwē taea matū mae anushū mā nuku merabewaya ana itxapabu matu ikūwāmakī nū ewawakatsi ikai nū matu manaii. ¹⁶Haskawē taea nuku kairā, mā nuku merabewaya Jesuskiri kakape bui mā Corinto anuabu bestima habu txai hiweabu anu tsuā hatu yusīriama anu yusi nū dayakatsis ikaii. Nū haska dayakūkainairā, yusīnā betsā yusiawē nū kēkatsi ikamaki. ¹⁷Haskakē tsuara kēkinā, hau nukū Shanē Ibu besti kēwākubainūbūwē. ¹⁸Hanua ibubis hawē xinānē besti hamēmē keaīnā, Deusū abuama hume humepamiski. Hakia tsuara ha nukū Shanē Ibukiri pe hātchairā, hakiri pe xināki kēwāmiski.

Yusīnā betsabū yusīmis Paulō danānikiaki, na hātstarā

11 ¹Haska hātchai ē patapamisrā, tenetā mā ea nīkatirumēkaī. Haskakiri ē matu yuiāi ea nīkakāwē. ²Haska matukiri xinaī nui ē matu yauximistrā, ibubis ē yurawē matu yauxiama haska Deusū matu abuāi ea matu amamiski. Matu haska wakatsi ikī hawenabū Cristo mā hawa heneyamashanūbū ē haska matu yuiāii. Huni betsā hawē bake txipax tsuā pesariama huni betsa yubamis keska wakī eāri Cristokiri matu yusīkinā, hawa txakabu hayama keska Cristo ē matu beismakatsis ikī ē matube yubakayamaki. ³⁻⁴Jesuskiri nū ma haska matu yusībianikē yusīnā betsabu bushū matu parākī haska Jesuskiri nū matu yusīma Jesus betsa keska wakī matu yusiāibu hawaira hatū hātcha hawērua abukī mā hatu nīkakubaīmiski. Ha inū, nukubū Deusū Yushī Pepa matuki nū ma matu dasiwabiyamakē yushī betsakiri matu yuiāibu mā hawaira atximamiski. Ha inū, haska kakape nū matu yuiāiama ibiyamakē kaka betsa mā hawaira txibaīwē taea matuwē ē dateaii. Haska Éden bai

anushū dunū Eva parani keska wakī hawara pepa Cristokiri mā ma hayabia henetā habū txakabu txibaī mā hamakiri benuaibuwē ē matuwē dateaii. ⁵Haska inū, eā ē xinānā, habu txipu kabiashū hātxa hawēruawē matu yusīkī ea binūkatsi ikaiburā, hawa ea binutirubumahairaki. ⁶Habū matu paraību unānepabu habū hātxa hawēruabiakē ea ē hui kuxipambia nukū Epa Deus inū nukū Shanē Ibukiri tapīnishū matu ashūkubaikī ē matu uīmamis keskawē habū ea binutirumahairaki.

⁷Matu anu kayamashū Deusū kakape datā akī matu yusīkī ē hawara hayamabia pei inū mabu matu yukakī ē matu txakabu wayamamē? Ē matu haska wama iyamaki. ⁸Hamē matu anushū matu yusīkī matu duawanū, iwanā, ē hawē dayatiru mae betsa anushū ikūwai betsabū pei hatu mebikī akawatā hawē matu merabewai ē dayayunū hatū pei ea inānibuki. ⁹Hanua matu anu yusi hiweyui kashū ē hawa hayamabia matu daketapa wakatsi ikama ē xināyā nukū betsabū Macedônia anushū haska ē hayama ē binū hatū pei ea bumayamabuki. Mā ma ea haska wayamawē taea matu anu ana ē kakenā, mā ea ayama keska besti ea wakubaīshākāwē. ¹⁰Matu merabewakatsi iki matuwē nuikī matū pei ē bisma yuikī hātxa txanima besti ē yuiiai Cristō unāyā hawara ē yusimis ē hawē keaī Acaia mai pakea anu maniabu tsuabūra ē hātxa nematirubuma ishākanikiki. ¹¹Haskai haska ē hātchai? Ē matuwē nuiamawē taeshū ē yuiiai? Haskamahairaki. Ē matuwē nuikī abuhairai Deusū unaikiki. ¹²Deusū daya ē amis keska habū ea mawapaikī hau hawawēra kēyamanūbū hatu nemakī haska matū pei bikī ē matu itxakawaisma ē habiaska besti ikūkaīshanaii. ¹³Hamē haburā, Cristō kuxipayakatsi ibiai yusinā kayabibumaki. Nuku keskakatsi ibiai peiwē kemui parananāmisbuki. ¹⁴Haska inū, Satanásāri nuku paranū, iwanā: “Ē Deusū tsumaki”, iwanā, nuku uīmairā, haska ¹⁵tashnishanai yuini hatuwē Satanás parananaī dayaikiki, “Nū Deusū tsumaburiki”, ikirā. Haskakī habū nuku parāmisbu Deusū hatū txakabu unātā hawē hatu kupishanikiki.

**Paulō yusībauni hawara bika teneni hawē keī
hatuki txaninikiaki, na hātcharā**

¹⁶Haska ē tatima keska ekiri xinākī tsuabūra mā haska xināmiskē haska mā habū xināmis ē tatima ibubis ē kētiru mā ana ekiri xināyamanūbū matu yui ē hawē keī hātchai ea nīkakāwē. ¹⁷Haska nukū Shanē Ibū ea yunuamabia emebi ē xinānē ē hātchai. Tsuara hamebi keī hātchai tatima ikasmis ē unaī ē haskakiri keī hātchai eari nīkakāwē. ¹⁸Habu keī ibubis hatū unānepawē binunānāmisbū eari haska keskariai ē imiskiri ē keīmēkainā. ¹⁹Ha inū, matu unānepabia tatimabu hātchai benimakī nemama mā hatu nīkamiski. ²⁰Haska inū, habūri matu dayaru watā matu yunuabu mā hatu dayashūmiski. Matu parābetanā, itxakawakī

matũ hawara matu biaĩbu mã hatu inãmiski. Habũ matu tãpais akabu mã tenemiski, haskatimabiakenã. ²¹Hakia nukurã, ha dukũ matu anu kai taeirã, nũ babu kaĩtãyamaki, dakekĩ haska yuitimabiakẽ ã matu yuiairã. Hakia natiã betsabũ hãtxa kuxipawẽ matu hãtxa wamis keska wakĩ eãri natiãri ã hãtxa tatima kuxipawẽ ã matu yuiaii.

²²Matu parãmisbũ habũ shenipabukiri kãkĩ yuikĩ: “Nũ Hebreonawabu inũ, nũ Israelbu inũ, nũ Abraãonẽ bababuki”, ikĩ txanima yuiaibunã, eari ã habiariki. ²³Ha inũ, habũ yuikĩ: “Nũ Cristõ tsumabuki”, iki Cristo dayashunaiburã, ã iriakũkainaii, Cristo dayashũkĩ hatũ daya binumahairairã. Mã eki hãtxai mã ea tatimawabianũ eã ã hatu binumiski. Ha inũ, Deusũ kakape ã yusiayã itxapaki ea bitximisbuwẽ eã ã hatu binuhairaki. Ha inũ, hatikira ea kuxanibu tsuabũra tanatirubumawẽ taeshũ ã hatu binuhairaki. Ha inũ, ã mawakeãkũkainiwẽ ã hatu binuhairariaki. ã haska tibi memis ã matuki txaniairã, earã, ã tatimamẽ? ã tatimamaki. ²⁴Deusũ kakape Cristokiri ã yusiãũmiswẽ taeshũ ea nemapaikĩ hanu ea akaĩbutiã judeu shanẽ ibubũ mekẽ bestitiki ea hatu kupimakĩ awa bitxi kuxatiwẽ hawẽtxaĩs 39 tibiki ea hatu pekux pekux amakubainabu ã mawakeãkũkaĩyamaki. ²⁵Haska inũ, Cristokiri ã yusiãũmiswẽ taeshũ ea nemapaikĩ Romano shanẽ ibubũri dabe inũ bestitũ hi kuxatiwẽ ea hatu pekux pekux amayamaburiki. Haska inũ, ea tenãpaikĩ mãkãwẽ ea tsaka tsaka akĩ ea xinã nemanibuki. Ha inũ, Cristokiri ã yusiãũmiswẽ niwe shashu dabe inũ besti habu tibi txakabuakeakeaya ã hasakeaniki. Ha shashu betsa anua mexu bestitxai inũ shaba bestitxai iã batapa anu shashuuma nunai tsuã ea neshetima hi tuashki mepia ã nunukũkauniki. ²⁶Haska inũ, Jesusũ kakapekiri yusi nũ kakũkaunai haska tibi mese ã binukubaĩmis matu ana yuinũ nĩkãkãwẽ. ã hene pukei kaya hawaira bai mata bekĩ ea shashu narabea inũ mãi pukei nua maeshbaĩ hasai ã mawakeãkũkainiki. Ha inũ, mãi ã kaya yumetsubũri ea mesewatã ã hamapai ea bianibuki. Ha inũ, enabu inũ enabumã ea itxakawakĩ ea date date akubaĩyamabuki. Ha inũ, mae ewapa tibi anushũ inũ hanu hiweabumanushũ hunibũ ea itxakawanũbũ yuinaka pianãbũ ea pikeãyamaki. Ha inũ, iãnẽwanu niwe shashuwẽ ã kaya niwẽwã mese bekĩ ea datekubaĩyamaki. Ha inũ, nukubetã ikũwaĩbu habũ ikũwãtxakaibũ ea bikawakĩ ekiri txanitxakubaĩyamabuki. ²⁷Ha inũ, ã dayatxakayamakũkaĩmiski, bika betsa betsapa tenebiakubainirã. Mexu betsa tukama ã usha tenemiski. Ha inũ, buni tenea inũ ãpash tenea piama ã ikũkaĩmiski. Ha inũ, matsi tari hayama hawa dakukuti hayamari ã matsi tenekubaĩmiski.

²⁸Haska tibi ena tenebiakĩ ha xinãma ã betsabu mae tibi anushũ mã ikũwaĩbuwẽ ã matuwẽ nuhairakũkaĩmiski, haska tibi binuirã. ²⁹Yura betsã bika tenei babuaya hawẽ nuikĩ ã habetã teneai keskamiski. Ha inũ, yura betsã ikũwaĩbu babu wakĩ txakabuamaya tsuãra hatu

txakabuwamaiwē ē hatuki sinatahairamiski. ³⁰Ē hawa hayama emebi ē haska kētirumabia haska ē babumiswē taea ē keaiī. ³¹Ē haska txani keāyā nukū Shanē Ibu Jesus Cristō Epa Deusū ē hātxa nīkakī txanima hātxa besti ē yuiāi unaīkiki, ha ikibi ini yurabū kēwākubaīshanaibunā. ³²Cristo ē ikūwākī taewabirāxina ea haska wanibu ana matu yuinū nīkakāwē. Shanē ibuhaira Aretasī Damasco mae ewapa yunumistū hawē soldadobu ea atximanū, iwanā, ha mae hawē mixki kene sheshekaiā hanu kaībaīti tibi anushū ea hatu atximakatsi iniki. ³³Haska hatu wamabiaya ikūwaību betsabu ē haibuaibū hanushū uīti kene shui anu kukiki ea nanetā dispiwē kukiki dūtātā ea hanu buteabu ea atxipanābū ē pashakainiki.

Hamapai tibi Deusū Paulo amanikiri hatu yuinikiaki, na hātcharā

12 ¹Nama keskawē hawara nukū Shanē Ibū ea uīmani ē matuki txani haskawē ē kētirumabia ekiri matu unāmahairakatsis ikī hawara nukū Shanē Ibuā ea shabakabi unāmani ē matu yuiāi nīkairakāwē. ²⁻⁴Ma 14 bari kakē nai binua keyatapahaira anu Deus hiwemis pepanu ē yura kasmai ē yushī besti Deusū ainitā ha hātxa tsuā shabakabi yuitiruma Deusū ea yuiniki. Haskara watā ea aininirā, ē yura kasmai ē yushī besti ea uīmani Deusū besti unaīwē taeshū eā ē matu yuitirumaki. ⁵Haska ē ini ē hawē kētirubia ē hawē hawa keāmaki. Hakia haska babukī ē tenemis bestikiri txanikī ē yuitiruki, keīnā, nukū Shanē Ibū ea merabewamiswē taearā. ⁶Haska inū, tatimabia ē keī hawara Deusū ea ashūmis yuikī hātxa txanima ē yuiaya hawara emebi ē akai inū hawara emebi ē yuiāi besti ikūwākī hawara betsa betsapa Deusū ea ashūmis ē ana matu yuikatsi ikamaki, mā tsuā ekiri haska xinākī yuitirubumakenā. ⁷Ha inū, haska pepahaira ē uīniwē taea keī ē hawēruayamanū Deusū nemama Satanāsā ea isī betsa inākī ea musha tekea keska ea wani ē teneaii. Ha inū, hawāra ea isī tenemaima tenekī ⁸hau ē Shanē Ibū ea shushawanū, iwanā, dabe inū bestiki ē ea aka ⁹dabe inū bestikiri ea yuikī: “Miwē nuikī ē mia duawamisrā, hatiwē besti mī benimatiruki. Isī tenei mī babubia mī ea dayashūkūkaikī ē kuxipa mī unātiruki”, ea waniki. Haskakē yura babu haya Cristō kuxipa hayakatsis iki haska emebi ē hawawatiruma ē hawē kētiruki. ¹⁰Haskakē babui Cristō kuxipawē ē kuxipatiruwē taea Cristo duawanū, ika ē xinā txākāmiski, eska tibiwenā, ē babuaiwē inū, eki sinataibuwē inū, ē yumaī hawaumawē inū, ea tenānū ishū ea itxakawaibuwenā, Cristowē dayai ē bika tenekubainaiwenā. Hanu ē babuhairaitianā, Cristō kuxipa ē mekubaīmiski.

¹¹Haska tatimai ē keai ē hawaumaki. Hakia mā ea kēwāma danaībuwē taea ibubis kēkī ē matu haska yuiāi. Ha unānepabu parananākī bemakis matu uīmakī haska ekiri hawauma matu yuimiburā, hatū hawawē ea binutirubumaki. ¹²Ha inū, bika betsa betsapa mebiakī ē

tenekubainimaki. Haska inũ, matube hiweshũ haska dasibi Jesusũ kuxipayabũ amis keska wakĩ eari habiaskari Deusũ kuxipa ẽ haya shabakabi matu uĩmakĩ dami betsa betsapa ẽ wakubainimaki, matũ berubirã. ¹³Ha inũ, haska ikũwaĩbu maniabu dasibi duawakĩ ẽ yusĩmis maturi ashũkubaĩkĩ hatũ pei ẽ bibiamis matuna ẽ matu yukama ikimaki. Matũ pei mã ea inãkatsi ikama xinãkĩ matu bikawakatsi ikama matũ merabewati yukama ẽ kaneimamẽkaĩ. Matube hiweshũ matũ hamapai merabewati biama matũ huĩti ẽ nixmawaimamẽkaĩ. Ẽ haskakĩ kaneimakẽ ẽ txakabu ea hakimakãwẽ.

**Dabe inũ bestiki Paulõ ana hatu uĩ kakatsi
hatu banabimanikiaki, na hãtxarã**

¹⁴Dabeki ẽ matu yusĩtanima samama ana matuki banũ ika ẽ kakatsis ikĩ ẽ matukiri ana xinãtanaii. Hakia haska bakebu yumeriabumã hatũ hamapai xarabu hatũ ibubu mekeshuĩsma hakia ibubũ hatũ hamapai hatũ bakebu mekeshũshũ hatũ hawara bishũmis keskakĩ eã dukũ Cristokiri ẽ matu yusĩtani ẽ matũ ibuki. Matu haska wakĩ ẽ bakebu keska ẽ matu aniwẽ taeshũ matũ hamapai ẽ matu mẽkatsis ikamaki. Hakia mã Cristoki dasiabũ ẽ yusĩa ikũwãkĩ txibãmisbũ mã ekiri xinãtiruki. Haskawẽ taea Cristo besti mã txibanũbũ ẽ matu ana yusĩ kakatsis ikaii. ¹⁵Matu anu hikitã matũ ibu keskakĩ matuwẽ nuhairakĩ matu merabewakatsis ikĩ ẽ hawara bikĩ dasibi ẽ pei putakĩ ẽ keyushanaii. Ha inũ, matu abuhairakĩ ẽ heneama ibiakũkainaya matunã, mã ea abu mirĩkĩ henekubaĩshanai?

¹⁶Habiaskabiakẽ matũ pei biãkĩ ẽ matu daketapa waismabiakẽ ekiri tsuãra yuikĩ: “Nuku parãkĩ nukũ pei Paulõ hune biãkubaĩmiski”, iwanã, haratura eki beparamekĩ mã ea yuãtiruki. ¹⁷Yusĩnã betsabu ẽ matu anu yunuxinabunã, habũ matũ pei itxawakĩ: “Ea bishũtãkãwẽ”, iwanã, ẽ hatu yunuamaki. ¹⁸Ha inũ, Tito inũ ikũwaĩ betsa matu anu ẽ yunuxinabunã, pei matu biãkĩ matu parãxinabumẽ? Haskamaki. Habu ebetã yusĩmisbu keska xinaĩbũ habiaskari yusĩkĩ eãri ẽ hatu yunumistũ ẽ matu paraĩsmariki. Habukiri txakabu xinãyamakãwẽ.

¹⁹Na eska ẽ matu yuiairã, hawara nũ matubetã kaneima ẽ ibubis nemakanã ikimẽkaĩ? Haska ekiri mã xinã txakatirubumaki, ẽ matu haska waismabiakenã. Hakia nuku hãtxairã, Deusũ nuku unãti wakubainaya Cristoki dasitã nũ hawenabũ matu merabewakatsis ikĩ matuwẽ nuikĩ hawara inũ haskara Deusũ nuku amakatsis ikai shabakabi matu ashũkĩ dasibi nũ matu uĩmamiski. Haskakẽ ẽ betsabu inũ ẽ puibuũ, hawara nũ matu yuiã txibãkĩ matũ hiwea pewatã Cristoki txiti itã kuxipai ewarikubaĩkãwẽ. ²⁰Ha inũ, tsuabũra ẽ hãtxa mã habũ danaĩ mã haskarara ẽ matu uĩ kashanai inũ, matũri haskarara mã ea uĩshanai matuwẽ ẽ dateaii, eska mã hiweamẽkaĩ ikarã, mã danãnanãbukuaĩwẽ inũ, huni betsa ikaiwẽ uĩ mã hatuki sinatamiswẽ inũ, mã pubeaĩwẽ inũ,

mã ibubis keĩ binũnãnaĩwẽ inũ, hune mã yuãnanaĩwẽ inũ, mã shabakabi txitenamemiswẽ inũ, “Eã besti ẽ hatu binuaki”, mã ikaiwẽ inũ, mã merabenameismawenã. ²¹Haska inũ, matũ mae ewapa anu ana ẽ kakẽ habũ txakabu betsa betsapa wakĩ kanekubaĩkĩ xinã betsa wariabumawẽ taeshũ Deusũ ea dakewashanaiwẽ ẽ dateaii. Uatiã mã txakabu heneriama ẽ matu uĩtanima keska ana habiaskaswẽ mã hiwea uĩ huĩti nixmahaira ẽ matuya kashatuxitiruki, eska tibiaibu uĩnã, tsuabura mã habũ txakabu heneriama haikaimas txakabuwẽ habũ xinã txakaibu inũ, huni dabe txutanameaibu inũ, aĩburi yura tibibube txutanameaibu inũ, atimapakĩ hatũ xinã benutã txakabu bestiwakubainaibuwenã. Ẽ betsabu inũ ẽ puibuũ, ẽ matu anu kariamakẽ matũ xinã betsa wai bebũkiri peparikãwẽ.

Corinto anuabũ hau hatũmebi unãtinanũbũ

Paulõ hatu yununikiaki, na hãtxarã

13 ¹⁻⁴Yurabu mai hirabi anu mekẽnũ ika Jesus babuyunikẽ hunibũ atxishũ cruzki netãtã tenaĩbu Jesusũ hatu nemamakẽ hanua ma tenãbu Deusũ hawẽ kuxipawẽ ana bestẽwaniki. Haskakẽ nukũ Shanẽ Ibu keska babuyui hawẽ kuxipa Deusũ nukuwẽ matu unãmamiswẽ taea niti ikama Cristobe nũ hiwekuĩkũkaĩshanaii. Habiaskabiakẽ Cristõ kuxipawẽ ẽ matu yunumismẽkaĩ mã unãkatsis ikaibu matu anu ana kashũ Cristõ hãtxa txanima kuxipawẽ ẽ matu ha atiru ẽ matu uĩmai kashanaii. Ẽ matu yusĩtani ana matu yusĩ matube ana ka hiwea ẽ yubakayama keska txai hiwebia matu dapishũ ẽ yuiiai keska ana ẽ matu banabimai nĩkairakãwẽ. Haratubũra ikũwaĩbũ txakabuwakĩ hatũ huĩti ana pewariabuma ẽ ana hatuwẽ nuiama iki kashanaii. Eska Deusũ yunua Moisés hatu yununiwẽ besti nũ hatu unãti watiruki: “Tsuãra txakabuwai hawẽ hãtxa unãkĩ yura dabe kasmai dabe inũ bestitũ hakiri txanii pikuaibũ habũ hãtxa ikũwãtirubuki”, ini ha yusĩa txibaĩ matũ itxati anu itxashũ habu txakabumẽkaĩ haska unãtinaĩ txitenamei penamebukũkãwẽ. ⁵Haskakẽ matu anu ẽ ana kariamakẽ Jesus Cristo matuki dasia mã haska ikũwãkĩ pewaimẽkaĩ. Matũmebi uĩkĩ matũ xinã uke merã unãkãwẽ. Betsabũ mã ikũwaĩmẽkaĩ. Betsabũ mã daki ikũwãbumaki. Matũmebi ibubis unãtinãkãwẽ, haska mã kaneamamẽkainã. ⁶Hamẽ nũ habũ matu yusĩmisrã, hawa txakabu wakĩ daka kanekĩ nũ matu uĩmatxakai hawa txĩtuãma nũ Jesus ikũwaĩ mã nuku unãtirubuki. ⁷Nukukiri xinãkĩ unãti wakĩ hatibũra nukũ yusĩa mã abuamabiakẽ haska nukukiri mã xinaĩ nũ hawẽ nuiamaki. Hakia mã pe besti hiwenũbũ nũ matuwẽ nuikũkainaii. Haska mã hiweabu hau hawa txakabũ matu atxiyamanũ Deusũ kuxipa nũ matu yukashũkubainaii. ⁸Haska wakĩ txanima hãtxa nũ danãtirumaki. Hakia txanima hãtxawẽ shabakabi nũ matu ashuãkeakemiski. ⁹Haska inũ, Deusũ matũ xinã kuxipa waya hau niti ikama mã pepaki nukunũbũ nũ babubia benimakĩ Deus nũ matu yuka heneshunama ikũkainaii.

¹⁰Haskakē matu uĩ kashũ matu ha akĩ nixmawakĩ ẽ matu ana babu wayamashanũ hakia merabewakĩ ẽ matu kuxipa wakubaĩshanũ nukũ Shanẽ Ibũ hawẽ kuxipa ea inãniwẽ matu yamawama mã ikũwaĩbu ẽ matu kuxipa wakatsis ikaii. Haskawẽ taea matu anu kariama bebũkiri ẽ hãtxa keneshũ ẽ matu bumaiwẽ taeshũ xinaĩrakãwẽ.

¹¹Ë betsabu inũ ẽ puibuũ, matu keneshũkĩ ma ẽ keyuai nĩkairakãwẽ. Epa Deusũ duawakĩ merabewakĩ unãnuma matu hiwemakatsi ikaya matũ huĩti benimakĩ hawara Deusũ matũ hiwea matu pewamakatsis ikai arikãwẽ. Ha inũ, punu nuka pesburã, hau merabenãkĩ matu benimawanũbũ Deus hatu yukashũkãwẽ. Mã haskai hiweabu Deusũ matu abukĩ matu unãnuma hiwemai matube hiwekũkaĩshanikiki.

¹²Ha inũ, nukunabu matuki nukuaibu Jesusũ kenawẽ yuka iki benimai ikukunãkubaĩkãwẽ. Ha inũ, ikũwaĩbu Macedõnia anuabũ hatũ hãtxa matu bumariakanikiki.

¹³Nukũ Shanẽ Ibu Jesus Cristõ hawẽ pepawẽ hau matu duawakubainũwẽ. Ha inũ, matuwẽ nuikĩ Deusũ hau matu merabewakubainũwẽ. Ha inũ, Deusũ Yushĩ Papatũ hau dasibibu matu haibunamemakubainũwẽ.

Hatiski, ẽ hãtxarã.

Paulo